

# Zacarías

Zacarías elqui se tiocamanalajquetl tlen tlatatqui ipan Babilonia huan ya mocueptoya ipan tlali Judá ica Zorobabel. Yajaya tequitqui ihuaya Hageo para quinyolchicahuase tlacame para sampa quicualtlalise nopa tiopamitl. Zacarías eliyaya tlayacanquetl tlen se familia tlen totajtzitzi. Yajaya quiitac miyac tlanextili tlen teyolchicajqui huan tlen tenextili para TOTECO sampa quicualtlalis Jerusalén huan nopa tiopamitl huan quintlapojpolhuis inintlajtlacolhua. Zacarías más camati tlen nopa Mesías que nochi sequinoc tiocamanalohuani. Ipan 9:9, Zacarías tlayolmelajqui tlen quejatza Jesús calaquis ipan altepetl Jerusalén, ipan 11:12 quiijto quejatza quinamacasquíaj ica 30 plata tomi, ipan 12:10 quiijto quejatza quicocosquíaj, ipan 12:10 quiijto quejatza miquisquía, ipan 14:4 quiijto quejatza nopa Jesús sampa hualas ipan tepetl Olivos huan quejatza tlanahuatis ipan ni tlattepectli.

**Zacarías quiipya eyi partes:**

**Zacarías 1 – 8** TOTECO quintemajmatía huan quinyolchicahua itlacajhua.

**Zacarías 9** Tlatzacuilitlistli para tlatini nechca israelitame

**Zacarías 10 – 14** Iltlanahuatijcayo Jesucristo huan nopa tlashuilitlistli tlen hualas.

**TOTECO quinnotzqui itlacajhua**

**1** Ipan metztli chichahui ipan tocalendario<sup>a</sup> quema Tlanahuatijquetl Darío yahuiyaya para ome xihuitl tlanahuatis, TOTECO nechmacac niitlocamanalajca se tlajtoli. Na niZacarías tlen niicone Berequías tlen eliyaya icone Iddo. Huan yajaya quiijto: <sup>2</sup>“NiimoTECO nicualanqui chichahuac ica mohuejcapan tatahua. <sup>3</sup>Yeca ama nijnequi xiquinmaca israelitame ni tlajtoli. Na, niininTECO Tlen Niquinyacana Noelhuicac Ejcahua Ma Tlatlanitij niqijtohua: ‘Ximonechcahuica campa na, huan na nimonechcahuis campa imojuanti.’ <sup>4</sup>Amo ximochihuaca queja imohuejcapan tatahua quichijque quema nopa achtohui tiocamanalohuani quinilhuijque para ma mocuepaca tlen nopa fiero ojtl tlen quitoquiliyayaj. Quena, quinilhuijque ma quicahuaca nochi nopa fiero tlamantli tlen quichihuayayaj, pero yajuanti ax nechtlac

caquilijque, niyon ax quichihuilijque cuenta nopa tlajtoli.” Queja nopa quiijtohua TOTECO Tlen Quinyacana Ielhuicac Ejcahua Ma Tlatlanitij.

<sup>5</sup>“Ama nochi imohuejcapan tatahua ya huejcajquiya mijque. Huan imojuanti nojquiya queja imohuejcapan tatahua huan nopa tiocamanalohuani tlen huejcajquiya san initztose se tlochtli. <sup>6</sup>Pero notlajtol tlen niquinilhui ipan nopa tonali ipampa notiocamanalajcahua tlen nechtequipanohuayayaj ax mijque. Senquistoc nochi nopa tlajtoli huan tlanahuatili tlen niquinilhui nopa israelitame mochijque ipan imohuejcapan tatahua queja niqijto para panos. Huajca teipa moyolcuepque imohuejcapan tatahua huan quiijtojqque: “TOTECO, Ta Tlen Tiquinyacana Moelhuicac Ejcahua Ma Tlatlanitij, titechtlatzacuilitjtoc senquistoc queja titechilhuijtoya titechchihuilisquía. Huan quinamiqui tlen

<sup>a</sup>1:1 Ipan octubre o noviembre ipan tocalendario tlen ama.

tijchijqui ipampa nopa tlamantli fiero tlen tijchihuayayaj huan ipampa nopa fiero oj-tli ipan tlen tinemiyayaj.’”

**Tlanextili tlen tlacame  
ipan cahuayojme**

7Huan sampa TOTECO nechmacac se tlajtoli ipan nopa xihuitl quema Tlanahua-tijquetl Darío yahuyaya para ome xihuitl tlanahuatis. Elqui ipan 24 itequi nopa metztli majtlactli huan se ipan tocalendario<sup>b</sup>. Nopa metztli quitocaxtiaj Sebat. Huan TOTECO sampa nechcamahui na, niZacarías, niitiocamanalojca huan niicone Berequías tlen eliyaya icone Iddo. 8Quena, ipan nopa yohuali niquitac se tlanextili huan ipan nopa tlanextili niquitac se tlatatl tejcotoya ipan se cahuayo chichiltic tlen moquetzayaya tepequespa campa tlafero ica miyac cuatini tlen inintoca mirtos. Huan iica itztoyaj sequinoc cahuayojme. Sequin tlen nopa cahuayojme eliyayaj chichiltique, sequin costique huan sequinoc chipahuaque. Huan ipan sesen cahuayo tejcotoya se tlatatl. 9Huan nijtlatzintoquili: “¿Tate, ajqueya yajuanti huan para tlen tejcotoque ipan cahuayojme? ¿Tlachque quinequi quijjtos?” Huan nopa elhuicac ejquetl tlen nechcamahuiyaya nechilhui: “Na nimitzilhuis ajqueya yajuanti.”

10Huajca nopa tlatatl tlen tejcotoya ipan nopa cahuayo chichiltic ipan nopa mirtos nechilhui: “Ni cahuayojme huan tlen ininpan tejcotoque itztoque tlen TOTECO quinhualtitlantoc para nemise campa hueli ipan tlattepectli para quitlachilise tlen onca.”

11Huan huajca nopa sequinoc tlen tejcotoyaj ipan cahuayojme quiyolmelajque ielhuicac ejca TOTECO tlen itztoya campa nopa mirtos tlen quiitaque, huan quej ni quihuhijque: “Ya tijyahualojtoque nochi tlattepectli huan campa hueli onca tlasehuilistli huan temachili.”

12Huan ielhuicac ejca TOTECO momajito ica TOTECO huan quijjto: “Oh, TOTECO, Ta Tlen Tiquinyacana Moelhuicac Ejca-

hua Ma Tlatlanitij, ya quiyiya 70 xihuitl para ticualantoc ica altepetl Jerusalén ehuan huan ica tlacame tlen hualahuij tlen altepetini ipan tlali Judá. ¿Quesqui tonali noja polihui para sampa tiquinnex-tilis motlaignelijcayo?”

13Huan TOTECO camatqui para quinanquili nopa elhuicac ejquetl tlen moquetzayaya nonechca huan nechcamahuiyaya huan TOTECO quihuhui tlajtoli tlen cuali huan tlen teyolchicahua.

14Huajca nopa elhuicac ejquetl tlen nechcamahuiyaya nechilhui ma nitlayolmelahua ni tlajtoli: “Quej ni quijjtohua TOTECO Tlen Quinyacana Ielhuicac Ejcahua Ma Tlatlanitij: ‘Tlahuel niqunicnelía huan niquntlasomati nopa tlacame ipan altepetl Jerusalén huan ipan tlali Judá huan nijnequi san na ma nechicnelica. 15Nojquiya tlahuel nicualantoc ica nopa tlatini tlen ama mosiyajcahuaj pampa quema na nicualantoya san se quentzi ica notlacajhua, nopa tlatini noja achi más fiero quinchihuilijque.”

16Huajca TOTECO quijjto: “Temachtli nimo-cuepas huan sampa nijtlasojtlas altepetl Jerusalén. Huan nopano sampa quicualtlalise notiopa huan tepanchihuani quitlamachi-huase nopa altepetl huan sampa quisenca-huase.” 17Nojquiya nechilhui noja ma ni-quijjto: “Quej ni quijjtohua TOTECO Tlen Quinyacana Ielhuicac Ejcahua Ma Tlatlanitij: ‘Nijchihuas para noaltepehua huan notlacajhua sampa ma quipiyaca nochi tlen cuali hasta mocahuas. Huan nijmocuitlahuis Sion<sup>c</sup> ica nohueyi tlaicnelijcayo. Quena, niqijjtos para Jerusalén eltoc nopa altepetl tlen nijtlapejenijtoc.’”

**Tlanextili tlen nahui cuacuajtli**

18Teipa niajcoitac huan niquitac nahui cuacuajtli.

19Huajca nijtlatzintoquili nopa elhuicac ejquetl tlen nechcamahuiyaya, huan niqihuhui: “¿Tlachque quiixnextiaj ne nahui cuacuajtli?”

Huan nechilhui: “Nopa nahui cuacuajtli quiixnextiaj ininchicahualis nopa talti-

<sup>b</sup> 1:7 Ipan 15 itequi febrero ipan tocalendario tlen ama.

<sup>c</sup> 1:17 Sion huan Jerusalén quinequi quijjtos san se altepetl.

ni tlen quiipiyaj chicahualistli tlen quinsemanque tlen ehuyayaj tlali Judá, tlali Israel huan altepetl Jerusalén.”

<sup>20</sup>Teipa TOTECO nechnextili nahui teposchihuani. <sup>21</sup>Huan na niqijto: “¿Tlachque hualajtoque quichihuaquij ne teposchihuani?”

Huan ielhuicac ejca TOTECO nechilhui: “Nopa teposchihuani hualajtoque para quintejequilise inincuacua nopa tlaltini tlen quinsemanque tlali Judá ehuan. Quinquixtilise ininchahualis hasta ayoc huelise moquetzase xitlahuac. Quena, quinchihuase ma huihuipicaca ica majmajtli nopa tlacame tlen tlaltini tlen nopa cuacuajtli quinextíaj.”

#### Tlanextili tlen se cinta para tlayejyecose

**2** Teipa niajcoitac huan niqitac se tlatl huan ipan ima quiipiyayaya se mecatl tlen ica tlayejyecohua. <sup>2</sup>Huan nijtlatzintoquili: “¿Canque tiya?”

Huan ya nechilhui: “Nijyeyecoti altepetl Jerusalén para niqitas quesqui ihuehueyaca huan quesqui ipatlajca.”

<sup>3</sup>Huan niqitac nopa elhuicac ejquetl tlen nechcamahuijtoya quistejqui para monamiquiti ihuaya seyoc elhuicac ejquetl tlen hualayaya quinamiquiqui. <sup>4</sup>Huan nopa elhuicac ejquetl tlen hualayaya quiilhui: “Ximotlalo campa ne telpoca tlatl huan xiquilhui para teipa altepetl Jerusalén quinpiyas miyac tlacame huan miyac tlapiyalime hasta ayoc quincuis altepejtíc huan miyac tlacame huan tlapiyalime mocahuase icalixpa nopa tepamitl. Pero yajuanti itztose ica temachili, <sup>5</sup>pampa na, quiijtohua TOTECO, nielis queja se tepamitl tlen tlitl tlen quiyahualos altepetl Jerusalén para nijmocuitlahuis. Huan nijtemitis nopa altepetl ica notlatlanex.”

#### Ielhuicac Ejca TOTECO camatqui ipampa TOTECO

<sup>6-7</sup>Huan TOTECO quiijto: “¿Xijtlacaquili inisraelitame! Nimechxolejqui campa hueli queja se chicahuac ajacatl tlasemasquía, pero ama nimechilhuía: ‘Xicholjotehuaca tlen nopa tlali ica ajco campa

ama initztoque queja inseyoc tlali ehuan. Quena, inJerusalén ehuan, xijtlacahuica tlali Babilonia huan ximomanahuica.”

<sup>8</sup>Pampa ya ni tlen quiijtohua TOTECO Tlen Quinyacana Ielhuicac Ejcahua Ma Tlatlanitij: “Quema monextis nohueyitilis, yajaya TOTECO nechtitlanis na ica ni tlajtolí para ma niquntehuis nopa tlaltini in-tla tlen hueli inmechchihuilijque. Pampa TOTECO quiijtohua para aqui hueli tlen inmechcuatotonía, initlacajhua, eltoc queja quicocohua iixtiyol sitlal, nopa tlen iaxca tlen achi más quimocuitlahuía. <sup>9</sup>Yeca na noseli niquntepachos nopa tlaltini huan nijchihuas para inintlatequipanojcahua ma quintlamitlachtequilica hasta ax tleno quiipiyase. Huan huajca quimachilise para TOTECO Tlen Quinyacana Ielhuicac Ejcahua Ma Tlatlanitij nechtitlanqui na.

<sup>10</sup>“Huajca xihuicaca huan xipaquica, imojuanti tlen altepetl Jerusalén, pampa na nihualas para niitztos tlatlajco imojuanti.” Queja nopa quiijto TOTECO. <sup>11</sup>“Huan ipan nopa tonali nojquiya tlacame tlen ehuj ipan miyac tlaltini mosansejcotilise ica TOTECO. Huan yonque ax israelitame, mochi-huase notlacajhua huan na nimocahuas para niitztos tlatlajco imojuanti. Huan huajca inquimachilise para TOTECO Tlen Quinyacana Ielhuicac Ejcahua Ma Tlatlanitij nechtitlanqui campa imojuanti. <sup>12</sup>Huan TOTECO yancuic moaxcatis tlali Judá tlen mopantía ipan nopa tlali tlen tlatzejtzeltolic huan sampa teyolmelahuas para quitlapejpenj-toc altepetl Jerusalén.”

<sup>13</sup>Ipan nochi tlattepectli ma axaca molini iixtla TOTECO pampa quistejqui ipan ichaj tlatzejtzeltolic ipan elhuicac huan ya ajsitoc ipan tlattepectli.

#### Tlanextili tlen iyoyo tlapajpactic Josué

**3** Teipa ipan nopa tlanextili, nopa elhuicac ejquetl nechnextili nopa hueyi to-tajtzi tlen itoca Josué. Yajaya moquetzayaya iixtla ielhuicac ejca TOTECO. Huan campa inejmatl Josué, moquetzayaya Ax-cualtlacatl huan quitlateilhuiyaya Josué ica miyac tlamantli.

<sup>2</sup>Huan ielhuicac ejca TOTECO quiilhui Ax-cualtlacatl: “Ma TOTECO mitztlateilhui,

Axcualtlacatl. Yajaya ax mitzselilia tlen ica tijteihua ni tlacatl. Pampa TOTECO ya quitlapejpenijtoc para quitlasojtlas Jerusalén. Huan yajaya quitlahuelcahuas tlen ica tijteihuijtoc ni totajtzi. Ni tlacatl itztoc queja se cuapipitzli tlen nijmanahuia tlen se hueyi tlitl huan ya tlatlajco tlatlatoc.”

<sup>3</sup>Huan quema Josué moquetztzoya iixtla ielhuicac ejca TOTECO, moquentijtoya yoyomitl tlen tlahuel soquiyó.

<sup>4</sup>Huajca ielhuicac ejca Toteco quinilhui nopa sequinoc tlen moquetzayayaj nopano: “Xijquixtilica Josué nopa yoyomitl tlen tlahuel soquiyó.”

Huan teipa ielhuicac ejca TOTECO quihui Josué: “Xiquita, ya ni quijtosnequi ya nimitzquixtilijtoc nochi motlajtlacolhua. Huan yeca ama nijchihuas para ma mitzquentica yoyomitl tlen nelia yejyetzzi.”

<sup>5-6</sup>Teipa nopa elhuicac ejquetl quincamahui nopa sequinoc tlen nopano itztoyaj huan quinnahuati ma quitlalilica ipan itzonteco se cuatzajcayotl tlen yancuic. Huan quitlalilijque. Huan quiquentijque iyoyo tlen yancuic huan ielhuicac ejca TOTECO moquetztzoya inechca. Huan ielhuicac ejca TOTECO quicamahui Josué huan quihui: <sup>7</sup>“Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: ‘Intla tijtoquilis noojhui huan tijchihuas nochi tlen nimitznahuatia, huajca nimitztequimacas titlayacanquetl tlen quiyiya más tequihuejcaoyotl ipan notiopa huan icalixpahua. Huan na nimitzcahuilis para ticalaquis huan tiquisas tlen na noixpa queja ni elhuicac ehuan quichihua tlen nechtequipanohuaj.

<sup>8</sup>“Ta tiJosué tlen tihueyi totajtzi inihuaya ni totajtzitzi tlen mosehufaj moixtla, xijtlacaquilica cuali ya ni, pampa nochi imojuanti iniquixnextijaj nopa cuajcuali tlamantli tlen hualase teipa. Temachtli na nijhualtitlanis notlatequipanojca tlen itoca Chamanquetl. <sup>9</sup>Quena, xijtlachilica nopa tetl tlen más ipati tlen nimitztencahuilis, Josué. Nopa tetl quiyiyas chicome iixtiyol tlen quinextis para nochi quimatis. Huan ipan nopa tetl na ntlajcuilos. Huan san ipan se tonali nijtla-miquixtis nochi tlajtlacoli tlen ni tlali.”

Queja nopa quijto TOTECO Tlen Quinyacana Ielhuicac Ejcahua Ma Tlatlanitij.

<sup>10</sup>“Huan inquinnotzase imohuampoyohua para ma mosehuica imohuaya imocalixpa inintzala xocomeca tzontli huan inintzala higuera cuatini. Huan inpaquise san sejco ica tlasehuilistli huan temachili.” Queja nopa quijto TOTECO Tlen Quinyacana Ielhuicac Ejcahua Ma Tlatlanitij.

#### Tlanextili tlen tlahuil quetzali huan ome olivo cuahuitl

**4** Huajca nopa elhuicac ejquetl tlen nechcamahuijtoya, nechixiti queja quixitijaj se tlacatl tlen cochtoc. <sup>2</sup>Huan nechilhui: “¿Tlachque tiquita?”

Huan na niquilhui: “Niquita se tlahuil quetzali tlen tlachijchihuali ica oro, huan quiyiya chicome tlahuili. Huan ica huejcapa tlen nopa tlahuili onca se caxitl campá quitecaj aceite. Huan yahualtic nopa caxitl, onca chicome tlahuili huan tubos quisayayaj tlen nopa caxitl para quipanoltise aceite ipan sesen tlahuili. <sup>3</sup>Huan ipan sese lado nopa caxitl onca se olivo cuahuitl. Se ipan inejmatl nopa caxitl huan seyoc ica iarraves.” <sup>4</sup>Na nijsenhuiquili nicamati. Huan nijtlatzintoquili nopa elhuicac ejquetl tlen nechcamahuiyaya, niquilhui: “Tate, ¿tlachque nochi ya nopa? Huan ¿Tlachque quixnextijaj?”

<sup>5</sup>Huan nopa elhuicac ejquetl tlen nechcamahuiyaya nechilhui: “¿Melahuac ax tijmati tlachque quixnextijaj?”

Huan na niquilhui: “Melahuac ax nijmati, tate.”

<sup>6</sup>Huajca yajaya nechilhui: “Ya ni quixnextia nopa tlajtoli tlen TOTECO quinequi quimacas nopa tequihuejquetl Zorobabel ica quejatza quitlamiltis nopa tiopamitl: ‘Ax ininpampa mosoldados, niyon ipampa mochicahuilis. San nopampa na notonal-tzi mochihuas.’ Queja nopa quijtohua TOTECO Tlen Quinyacana Ielhuicac Ejcahua Ma Tlatlanitij.

<sup>7</sup>“Huan tlen huili tlahuijcaoyotl tlen nesis queja se hueyi tepetl para quitzacuilis itequi Zorobabel, mocuepas ica se tlamayamitl tlen ax más ohui. Huan quema quitlalis itlamiya tetl tlen nelia yejyetzzi

ipan itzonpac nopa tiopamitl, nochi israel-itame tzajtise ica paquilistli huan quiijto-se: “¡Ma TOTECO quitiochihua! ¡Ma TOTECO quitiochihua!”

#### Zorobabel quisencahuas nopa tiopamitl

<sup>8</sup>Huan TOTECO nechmacac ni tlajtoli: <sup>9</sup>“Zorobabel quitlali itzinpehualtil nopa tiopamitl huan yajaya quisencahuas. Huan huajca inquimachilise para TOTECO Tlen Quinyacana Ielhuicac Ejcahua Ma Tlatlanitij nechtitlanqui campa ta. <sup>10</sup>Ma axaca moilhui para ax tleno ipati nopa tlamantli pilsiltzitzi tlen quichihuas para ica quipehualtis nopa tiopamitl, pampa paquise quema quitase nopa plomada imaco Zorobabel quema nopa tequitl cuali yohui. Huan nopa chicome iixtiyolhua TOTECO tlen tlachiyaj campa hueli ipan nochi tlaltepectli quipalehuise ma quitlami-sencahua nopa tiopamitl.”

<sup>11</sup>Na sampa nicamatqui huan nijtlatzintoquili: “¿Tlachque quiixnextíaj ne ome olivo cuahuil tlen eltoque ipan sesen lado tlen ne tlahuil quetzali?” <sup>12</sup>Huan nojquiya niquilhui: “¿Tlachque quiixnextíaj ne ome ininmacuayohua ne cuatini olivo tlen quitoyahuaj nopa aceite tlen eltoc queja oro ipan nopa ome tubos tlen oro?”

<sup>13</sup>Huan yajaya nechilhui: “¿Ax tijmati tlachque quiixnextíaj?”

Huan na niquilhui: “¡Axtle, tate, ax nijmati!” <sup>14</sup>Huajca yajaya nechilhui queja ni: “Quiixnextíaj nopa ome tlacame tlen quinajaltijtoque huan quinquimacaque para quitequipanose TOTECO tlen quinquahuatía nochi tlaltepectli.”

#### Tlanextili tlen nopa amatlajcuiloli tlen patlani

**5** Huan sampa niajcoitac huan niquitac patlanti se amatl tlen quiyiya tlajcuiloli. <sup>2</sup>Huan nopa elhuicac ejquetl nechilhui: “¿Tlachque tiquita?”

Huan na niquilhui: “Niquita patlanti se hueyi amatl tlen quiyiya tlajcuiloli. Huelis quiyiya chicnahui metros ihuehuyaca huan nahui metro huan tlajco ipatljaca.”

<sup>3</sup>Huajca nechilhui: “Ipan nopa amatl ijcuilijtoc nopa tlatelchihualistli tlen TOTECO

quititlani ipan ni tlali. Ipan se lado ijcuilijtoc para nochi tlen tlaxtequij, quitojtocase. Huan ipan nopa seyoc lado ijcuilijtoc para nochi tlen quitestigojquetzaj tlen ax neli ayoc hueli itztose nopano. <sup>4</sup>Ya ni tlen quiijtohua TOTECO Tlen Quinyacana Ielhuicac Ejcahua Ma Tlatlanitij: “Na nijtitlanis ni tlatelchihualistli ipan ininchajchaj nochi tlen momatque tlaxtequij huan ipan ininchajchaj nochi tlacame tlen tlatestigojquetzaj ipan notoca ica tlamantli tlen ax melahuac. Huan nopa tlatelchihualistli tlen nijtitlantoc mocahuas ipan sesen nopa caltini hasta quintlami-xolehuase ica nochi ininucuatetonyo huan nochi tetl tlatecpicholi.”

#### Tlanextili tlen se situatl ipan se tlayejyecoli

<sup>5</sup>Huajca nopa elhuicac ejquetl tlen nechcamahuiyaya nechcajtejqui se tlatlochtli. Teipa sampa hualajqui huan nechilhui: “Ama xiajcotlachiya huan xijtlachili tlen monextijtoc.”

<sup>6</sup>Huan nijtlatzintoquili: “¿Tlachque ya nopa?”

Huan yajaya nechilhui: “Ya ne eli se chiquihuitl tlen eli se tlayejyecoli para trigo huan temitoc ica nochi inintlajtlacolhua nochi tlacame tlen itztoque ipan ni tlali.”

<sup>7</sup>Nopa chiquihuitl quipixqui itepos tzajca tlen plomo tlen tlahuel etc. Huan teipa quitlalanque iixtzajca huan ipan nopa chiquihuitl niquitac mosehuijtoc se situatl. <sup>8</sup>Huan nopa elhuicac ejquetl nechilhui: “Nopa situatl quiixnextía tlajtlacolotl huan nochi tlen ax cuali.” Huan teipa quicuato-pejqui nopa situatl para sampa quicalaquis ipan nopa chiquihuitl huan quiixztajqui ica iixtzajca tlen tlahuel etc.

<sup>9</sup>Teipa sampa nijtlachili huan niquin-itac ome sihuame tlen patlantihualayayaj campa tojuanti ipan nopa ajacatl ica inieltlapalhua. Huan ni sihuame quiyiyayaj inieltlapal queja ieltlapal nopa tototl tlen quitocaxtíaj cigüeña. Huan yajuanti quicuicoj nopa chiquihuitl huan patlantiyajque huan quihuicaque ipan ajacatl.

<sup>10</sup>Huan nijtlatzintoquili nopa elhuicac ejquetl tlen nechcamahuiyaya: “¿Canque quihuicaj ne chiquihuitl?”

<sup>11</sup>Huan yajaya nechilhui: “Quihuicaj ipan tlali Babilonia para quichijchihuilij itiopa. Huan quema ya quisencajtose nopa tiopamitl, quitlalise nopa chiquihuitl nopano ipan se mesa para quinextise.”

#### Tlanextili tlen nopa nahui carrojme

**6** Sampa niajcoitac huan niqunitac nahui tlatehuijca carrojme tlen quisayayaj tlajco tlen nopa ome huejhueyi tepetini tlen eltoc queja nopa tepostli bronce. <sup>2</sup>Nopa achtohui tlatehuijca carro quinpixtoya cahuayojme tlen chichiltique tlen quitlanayayaj. Nopa ompa tlatehuijca carro quinpixtoya cahuayojme tlen yayahuique. <sup>3</sup>Nopa expa tlatehuijca carro quinpixtoya cahuayojme tlen chipahuaque. Huan nopa najpa tlatehuijca carro quinpixtoya cahuayojme tlen ixtenextique.

<sup>4</sup>Huajca niquilhui nopa elhuicac ejquetl tlen nechcamahuiyaya: “Tate, ¿tlachque quiixnextíaj ne tlatehuijca carrojme?”

<sup>5</sup>Huan yajaya nechilhui: “Yajuanti quinixnextíaj nopa nahui elhuicac ehuanitlen itztoque iixpa TOTECO tlen quinahuatía nochi tlaltepectli. Huan hualahuij para quichihuaquij nopa tequitl tlen TOTECO quinilhujitoc ma quichihuaca. <sup>6</sup>Nopa carro ica cahuayojme tlen yayahuique, yohuij ipan nopa tlali tlen mocahua ica norte. Huan nopa carro ica cahuayojme chipahuaque, yohuij ipan nopa tlali campa calaquí tonati. Huan nopa carro ica cahuayojme tlen ixtenextique yohuij ipan nopa tlali tlen mocahua ica tlani.”

<sup>7</sup>Pero nopa cahuayojme tlahul motelilyayaj pampa quinequiyayaj yase para nemise ipan nochi tlaltepectli. Huan nopa elhuicac ejquetl quinilhui: “¡Cualtitoc! Xiyaca huan xinemica campa hueli ipan nochi tlaltepectli.” Huan yajuanti nimantzi quisque huan yajque ipan inintequi.

<sup>8</sup>Huajca ielhuicac ejca TOTECO nechmacac na, niZacarías, ni tlajtoli, nechilhui: “Xiquita, yajuanti tlen yajque ipan nopa tlali ica norte, quitlalitoj tlatzacuiltli nopano. Huan yeca mosiyajcajtoc Noto-

nal nepa huan nechyoltlali tlen nohueyi cualancayo.”

#### Se corona ipan itzonteco Josué

<sup>9</sup>Huan TOTECO nechmacac ni tlajtoli, quijto: <sup>10</sup>“Xiya ama ipan ichaj Josías, icone Sofonías huan xijselili nopa plata huan oro tlen quihualicaj Heldai, Tobías huan Jedaías tlen mocueptoque tlen tlali Babilonia. <sup>11</sup>Huan ica nopa plata huan oro, xijchijchihua se corona, huan teipa xijtlalili ipan itzonteco nopa hueyi totajtzitzi Josué tlen icone Josadac. <sup>12</sup>Huan teipa xiquilhui Josué: ‘Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: Teipa hualas nopa tlacatl tlen itoca Chamanquetl. Yajaya chamanis ica iseli huan quichijchihuas TOTECO itiopa. <sup>13</sup>Quena, elis ya tlen quichihuas itiopa TOTECO huan yajaya quipiyas ihuextilis huan mosehuis queja tlanahuatijquetl ipan isiya campa tlanahuatía. Huan yajaya nojquiya elis se totajtzitzi tlen mosehuía ipan nopa siya tlen tlanahuatijquetl para tlanahuatis. Huan oncas tlasehuilistli ica nopa ome itequi.’

<sup>14</sup>“Teipa nopa corona xijtlalica ipan tiopamitl para inmechilnamiquiltis tlen nopa tlen temaque Heldai, Tobías, Jedaías huan Josías icone Sofonías. <sup>15</sup>Huan miyac tlacame tlen huejca ehuan hualase para quipalehuise para quicualtlalise itiopa TOTECO. Huan quema mochihuas ya nopa, inquamachilise para TOTECO Tlen Quinyacana Ielhuicac Ejcahua Ma Tlatlanitij nechtitlanqui campa imojuanti. Nochi ya ni panos quema imojuanti inquinaquise itos imoteco Dios huan inquineltofase.”

#### Quejatza monequi mosahuase para quisas cuali

**7** Quema Tlanahuatijquetl Darío yohuiyaya para nahui xihuitl tlanahuatis sampa hualajqui se tlajtoli tlen TOTECO para na, niZacarías. Nechmacac nopa tlajtoli ipan 4 itequi nopa metztli tlen itoca Quisleu, tlen eltoc metztli chicnahui ipan tocalendario<sup>d</sup>. <sup>2</sup>Ipan nopa tonali nojquiya

<sup>d</sup>7:1 Ipan 7 itequi diciembre ipan tocalendario tlen ama.

nopa tlacame tlen altepetl Betel quintitlanque Regem Melec, Sarezter huan inintlacajhua ma yaca hasta itiopa TOTECO ipan Jerusalén para ma quitlajtlanitij TOTECO itlatiochihual. <sup>3</sup>Huan nojquiya quinejque ma quitlajtlanitij nopa totajtzi intla noja quisenhuiquilise chocase huan mosahuase iixtla TOTECO sesen xihuitl ipan metztli macuili queja quichijtoyaj para miyac xihuitl.

<sup>4</sup>Huan teipa sampa nechmacac se tlajtoli TOTECO Tlen Quinyacana Ielhuicac Ejcahua Ma Tlatlanitij, huan yajaya quijito: <sup>5</sup>“Xiquincamahui nochi tlacame ipan ni tlali huan nochi totajtzitzi huan xiquinilhui: ‘Ipan nochi nopa 70 xihuitl quema inchocayayaj huan inmosahuayayaj ipan metztli macuili huan inilhuichihuayayaj ipan metztli chicome, ¿inmoilhuyayaj inquichihuayayaj para innechtepanitaj huan para nelía inquicahuase imotlajtlacolhua huan inmonechcahuise campa na? ¡Ax neli! <sup>6</sup>Huan ama ipan ni tonali nojquiya, quema inquichihuj ilhuitl, ax inmoilhuíaj tlen na. Inquichihuj para intlacuase huan intlaise san sejco, huan para inixhuise. <sup>7</sup>Nelía san se ni tlajtoli tlen nimechilhuía ama ica nopa tlajtoli tlen huejcajquiya nimechmacac ipampa notiocamanalocahua. Ipan nopa tonali Jerusalén huan nochi ipilaltepetzitzi huan nopa Neguev huan Sefela quinpixque tlahuel miyac tlacame huan quipixque tlashuilitli pampa aya niquintlatzacuiltiyaya.’”

#### Para tlen TOTECO ax quinnanquilía

<sup>8</sup>Teipa sampa TOTECO nechmacac na, niZacarías, se tlajtoli huan quijito: <sup>9</sup>“NiimoteCO Tlen Niquinyacana Noelhuicac Ejcahua Ma Tlatlanitij huan niqijtohua: ‘Xitetlajtolsencahuaca xitlahuac. Monequi sesen imojuanti ximotlasojtlaca huan ximoicnelica se ica seyoc queja initzosquíaj inicnime. <sup>10</sup>Amo xiquintlajijiyohuiltica cahualme, niyon icnotzitzi, niyon teicneltzitzi, niyon tlacame tlen hualahuj tlen seyoc tlali. Amo ximoilhuica ipan imoyolo para inquicocose seyoc tlatatl.’”

<sup>11</sup>“Pero quema niqinilhui ya ni, imohuejcapan tatahua ax quichihuilijque

cuenta notlajtol. Moicancuepque huan quitzajque innacas ica ininmacpil para ax quicaquise tlen niqinilhuyaya. <sup>12</sup>Yajuanti tlahuel moyoltetilijque pampa ax quinejque quitlacaquilise nopa tlajtoli huan nopa tlanahuatili tlen, niininteCO, niqinilhuyaya ipampa Notonal tlen nijtitlanqui ipan nopa tiocamanalohuani. Huan pampa ax quichihuilijque cuenta notlajtol, hualajqui ininpani nohueyi cuallancayo, niininteCO, Tlen Niquinyacana Noelhuicac Ejcahua Ma Tlatlanitij.

<sup>13</sup>“Huan pampa ax quichihuilijque cuenta quema na niqinnojnnotzqui, nojquiya ayoc niquintlacaquili quema yajuanti nechtzajtziyayaj. Queja nopa niqijtohua niimoteCO Tlen Niquinyacana Noelhuicac Ejcahua Ma Tlatlanitij. <sup>14</sup>Huan niqinsemanqui imohuejcapan tatahua queja se chicahuac ajacatl quise mana tlasoli. Niquinchihualti ma yaca ipan nochi taltini campa hueli ipan tlaltepectli. Huan inintlal mocajqui queja se tlamantli tlen quitlahuelcajtoque huan sosolitic. Huan pampa ayoc aca panoc nopano, nopa tlali mocajqui queja se huactoc tlatli.”

#### TOTECO quintlajtolcahuili para quintiochihuas

**8** Huan sampa nechmacac se tlajtoli TOTECO Tlen Quinyacana Ielhuicac Ejcahua Ma Tlatlanitij, huan quijito: <sup>2</sup>Quej ni niimoteCO niqijtohua, na Tlen Niquinyacana Noelhuicac Ejcahua Ma Tlatlanitij: “Tlahuel niquintlasomati notlacajhua ipan Jerusalén pampa niqinicnelía miyac. Nijnequi san na ma nechicnelica huan nicualani miyac intla ax nechicnelíaj.” <sup>3</sup>Huajca ya ni tlen TOTECO quijtohua: “Temachtli na nimocuepas ipan Sion huan nimocahuas para niitzos ipan altepetl Jerusalén. Huan nopa altepetl quitocaxtise: Altepetl Tlen Nopa Tlamantli Tlen Melahuac. Huan quitocaxtise: Itepe TOTECO Tlen Quinyacana Ielhuicac Ejcahua Ma Tlatlanitij. Huan quitocaxtise: Tepetl Tlen Tlatzejtzelotli.”

<sup>4</sup>Quej ni quijtohua TOTECO Tlen Quinyacana Ielhuicac Ejcahua Ma Tlatlanitij:

“Altepetl Jerusalén sampa quipiyas paquillistli huan tlasehuilistli. Se tonali huehuentzitzli huan nanatzitzli sampa nejnemise ipan icalles. Huan sesen tlen yajuanti quihuicas icuatopil pampa miyac xihuítl quipiyase. <sup>5</sup>Huan nopa calles temise ica miyac oquichpilme huan sihuapilme tlen mahuiltise nopano.”

<sup>6</sup>Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: “Ipan nopa tonali nopa tlacame tlen noja mocahuase, quisentlachilise quema sampa oncas miyac tlacame queja elisquía se tiochicahual nescayotl o se tlamantli tlen hueyi, pero ax ohui para na, pampa ax tleno ohui para nijchihuas.” Queja nopa quijtohua TOTECO.

<sup>7</sup>Ya ni tlen quijtohua TOTECO Tlen Quinyacana Ielhuicac Ejcahua Ma Tlatlanitij: “Na niquinmaquixtis notlacajhua ininmaco inincualancaitacahua tlen itztoque ipan nopa tlaltini campa quisa tonati huan campa calaqui tonati. <sup>8</sup>Niquinhuilicas tlen campa hueli huan mocahuase para itztose ipan altepetl Jerusalén. Huan yajuanti elise notlacajhua huan na nielis niinDios tlen nelía xitlahuac huan temachtli.”

<sup>9</sup>Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: “Xijpiyaca chicahualistli, imojuanti tlen inquicaquij ni tlajtoli ipampa nopa tiocamanalohuani huan initztoyaj nopano quema quitlalijque nopa tzinpehualtili. Xitequitica chicahuac huan xijtlamiltica nopa tiopamitl. <sup>10</sup>Achtohuiya quema aya inquehualtiyayaj para inquichihuase nopa tequitl, ax oncayaya tequitl, niyon tomi para se quitlaxtlahuis seyoc para itequi o para itequi itlapiyal. Huan axaca huelqui quisas ipan altepetl huan quimati ica temachtli para mocuepas pampa nochi inquinpixque miyac imocualancaitacahua pampa nijchijtoya nochi imojuanti ximococolica se ica seyoc. <sup>11</sup>Pero ama ayoc ni quinchihuilis notlacajhua tlen noja mocahuase queja ni quinchihuili achtohui.” Queja nopa quijtohua TOTECO Tlen Quinyacana Ielhuicac Ejcahua Ma Tlatlanitij. <sup>12</sup>“Ama nijchihuas para pehuas para on-

cas tlasehuilistli campa imojuanti huan nijchihuas para xiitztoaca ica paquillistli. Nochi tlamantli tlen inquitocase, temacase cuali itlajca. Huan xocomeca mili temacac cuali itlajca. Huan nopa tlali achi más tlaeliltis. Huan nopa mixtli quichihuas mahuetzi miyac atl. Nochi ni tlatiochihualistli quiselise nopa tlacame tlen noja mocahuase ipan nopa tlali. <sup>13</sup>Nopa tlaltini tlen ax quixmatij TOTECO quijtohuayayaj para inisraelitame tlen tlali Israel huan tlali Judá inquinextiyayaj se tlamantli tlen tlatelchihuali. Pero ama nimechmaquixtis huan nochi inmechitase para initztose se tlatiochihualistli para nochi tlacame. Huajca amo ximajmahuica. Ximosemacaca huan xijpiyaca fuerza huan xijtlamiltica nopa tiopamitl.”

<sup>14</sup>Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: “Huejcajquiya quema imohuejcapan tatahua nechcualancamacaque, nimotemacac para niquintlatzacuiltis huan, quena, niquintlatzacuilti. Ax nimoyolpatlac. <sup>15</sup>Huan ama nojquiya tlen ni quijtohua para nijchihuas, temachtli nijchihuas. Huan ya nimotemacac para nijtiochihuas nochi altepetl Jerusalén huan tlali Judá, huan quena nijchihuas. Huajca amo ximajmahuica. <sup>16</sup>Ya ni tlen monequi inquichihuase imojuanti: ‘Ximocamahuica se ica seyoc ica tlajtoli tlen melahuac. Xitetlajtolsecahuaca xitlahuac. Huan xijtemoca tlamantli tlen inmechhualiquilis tlasehuilistli. <sup>17</sup>Ma axaca moilhui ipan iyolo para quichihuilis seyoc se tlamantli tlen ax cuali. Ayoc xijtestigojquetzaca para melahuac se tlamantli tlen inquitamij para ax melahuac queja ama inmechpactía inquichihuaj. Ya nopa ax nijnequi ni quitas.’” Quej nopa quijtohua TOTECO.

<sup>18</sup>Huan ajsic seyoc tlajtoli tlen TOTECO huan quijto: <sup>19</sup>“Quej ni quijtohua TOTECO Tlen Quinyacana Ielhuicac Ejcahua Ma Tlatlanitij: ‘Nopa tonali quema inmosahuayayaj ipan nopa ilhuítl ipan metztli nahui, macuili, chicome huan majtlaclitl mocuepase tonali quema intlamahuisotij. Nopa ilhuime mocuepase tonali tlen paquillistli huan nochi israelitame ma paqui-



ca quema quinilnamiquise nopa tonali. Huajca xijnequica tlamantli tlen melahuac tlen quichihuas ma oncas tlasehuilistli.' <sup>20</sup>Huan TOTECO Tlen Quinyacana Ielhuicac Ejcahua Ma Tlatlanitij quijto: 'Tlacame tlen itztoque ipan miyac altepetini huan taltini campa hueli ipan tlattepectli hualase ipan Jerusalén. <sup>21</sup>Tlacame tlen se altepetl yase quinitatij nopa tlacame tlen itztoque ipan seyoc altepetl huan quinilhuitij: Ma tiyaca ipan altepetl Jerusalén para tijtemotij TOTECO Tlen Quinyacana Ielhuicac Ejcahua Ma Tlatlanitij. Timomaijtose iixtla huan tijtlajtlanise ma techtiochihuas. Huan huajca quijtose: Tojuanti nojquiya tiyase. <sup>22</sup>Huan hualase ipan Jerusalén miyac tlacame tlen miyac altepetini huan tlen taltini tlen quiyiyaj miyac chicahualistli. Huan quitemose TOTECO Tlen Quinyacana Ielhuicac Ejcahua Ma Tlatlanitij huan momaijtose iixtla huan quitlajtlaniquij itlapalehuil huan itlatiochihualis.'

<sup>23</sup>"Huan quej ni quijtohua TOTECO Tlen Quinyacana Ielhuicac Ejcahua Ma Tlatlanitij: 'Ipan nopa tonali tlahuel miyac tlacame tlen ehuaní ipan nochi taltini huan tlen camatij nochi tlamantli taltoli, quiitzquise ipan iyoyo se israelita huan quiilhuse: Tiyase mohuaya pampa tijmatij para TOTECO Dios itztoc mohuaya.'"

#### Inintlatacuiltil taltini tlen nechca

**9** Ya ni nopa taltoli tlen TOTECO teyolmelajqui ica nopa tlatzacuiltili tlen quinajsis altepetl Damasco huan tlati Hadrac ehuaní. Yajaya quijto: "Ipan nopa tonali nochi tlacame ipan nochi altepetini huan nochi nopa huejhueyi familias tlen israelitame nechtlachilise na, niininteco. <sup>2</sup>Nojquiya altepetl Hamat tlen mopantía nechca Damasco quipantis tlen ax cuali huan altepetini Tiro huan Sidón nojquiya. Quena, quiselise tlatzacuiltili yonque neltalnamiquij. <sup>3</sup>Yonque ipan altepetl Tiro quichijchijtoque huejhueyi caltini tlen tilahuac para ipan momanahuse huan yonque quiyiyaj tomi tlen plata huan tlen oro queja imiyaca tlattejpochtli tlen onca ipan

calle, <sup>4</sup>Toteco quiquixtis nochi tlen quiyiyaj. Huan nochi nopa tlamantli tlen quiitayaya para ichicahualis, Toteco quichihuas para ma huetzi ipan hueyi atl. Huan nopa altepetl tlamitlatlas.

<sup>5</sup>"Huan quema nopa tlacame tlen itztoque ipan altepetl Ascalón quiitase para huetzqui altepetl Tiro, momajmatise miyac. Huan nopa tlacame tlen itztoque ipan altepetl Gaza tlahuel mocuesose. Huan nopa tlacame tlen itztoque ipan altepetl Ecrón huihuipicase pampa quiitase para altepetl Tiro ayoc huelis quinmanahuis tlen inincualancaitacahua. Huan quinmictilise inintlanahuatijca nopa tlacame tlen altepetl Gaza. Huan altepetl Ascalón mochahuas queja tlati tlen quitlahuelcajtoque pampa ayoc mochahuas niyon se tlatatl.

<sup>6</sup>"Huan seyoc tlati ehuaní hualase para itztoque ipan altepetl Asdod. Huan ininpampa yajuanti nijtlamiltis nochi tlen ica mohueyimatiyayaj nopa filisteo tlacame. <sup>7</sup>Nijchihuas para ayoc quicuase se tlatiyali ica ieso. Huan ayoc niquincahuilis ma quicuaca sequinoc tlamantli tlen ax quinamiqui quicuase niyon quinhueyichihuase inintotitzi. Huan nochi yajuanti tlen noja mochahuase yoltoque nepa, quihueyichihuase Toteco Dios, huan mochihuase tequitini ipan tlati Judá. Huan tlacame nopano quinselise queja se familia tlen yancuic. Quena, nopa filisteos tlen Ecrón mochihuase san se ica israelitame queja huejcajquiya nopa jebuseos mochijque san se ininhuaya. <sup>8</sup>Huan na niquinahuales notlacajhua queja se tlamocuitlahuiquetl huan ax niquincahuilis nopa miyac soldados tlen panoque ma mocuepase para quintehuiquij. Niyon se tlen quintalijyohuiltisquía ayoc quema panos nica pampa ama na nitlachixtoc huan niquinmocuitlahuía."

#### Hualas inintlanahuatijca israelitame

<sup>9</sup>¡Xipaquica miyac, intlacame ipan Jerusalén! ¡Xitajtzica ica paquilistli, nochi inisraelitame campa hueli! Imotlanahuatijca neca huala. Yajaya senquistoc xitlahuac huan temaquixtía. Moicnonequi huan huala ipan se pilburrojtzí. Quena, yajaya huala ipan icone se síhua burra.

**Tlachque quichihuas inintlanahuatijca**

<sup>10</sup>Huan nopa Tlanahuatijquetl quijtohua: “Nijxolehuas nopa tlatehujca carrojme tlen quinpiyaj ipan tlali Israel campa itztoyaj iixhuihua Efraín huan nopa tlatehujca cahuyoyjme tlen itztoque ipan altepetl Jerusalén. Nijpostequis nopa cuahuitoli tlen quitequihuáaj ipan tlatehuilistli.” Quena, queja nopa quichihuas. Huan quinmacas tlatehuilistli nochi taltini. Huan itlanahuatijcayo ajsis tlen se hueyi atl hasta seyoc hueyi atl. Huan tlen nopa atentli Éufrates ajsis campa hueli hasta san itlamiya tlatpeactli. <sup>11</sup>TOTECO quijtohua: “Huan pampa nijchijqui se tlajtol-sencahuali imohuaya, inisraelitame, tlen quisellojhuijque ica estli huejcajquiya, yeca nimechmanahuis tlen initztoque ipan tlatzactli san se queja nijchololti José tlen itztoya ipan nopa aostotl tlen ax quipixqui atl huejcajquiya. <sup>12</sup>Imojuanti tlen ineliyayaj intlatzactoque campa hueli, ximocuepaca nopan na tlen niitztoc queja se cali tlen tlahuel quiapiya chicahualistli. Nopan na initztose temachtli. Nopan na ximotemachica quema noja onca tonali. Huan nimechymelahuas para nimechtiocihuas ome hueltas ipampa sesen tlahuhijcayotl. <sup>13</sup>Pampa se tonal nijtequihuis tlali Judá ehuan queja nocuahuitol. Huan itlacajhua tlali Efraín o Israel elis queja se cuatlamintli ipan nocuahuitol tlen ica nitlatehuis. Nopa telpocame ipan Jerusalén moquichmatise huan elise queja se machete nomaco tlen niqinhuicas ipan tlatehujcayotl ica nopa soldados tlen tlali Grecia ehuaní.”

**TOTECO monextis****para quinmanahuis itlacajhua**

<sup>14</sup>Huan ipan nopa tlatehujcayotl, TOTECO monextis iniixco itlacajhua. Huan nopa cuatlamintli tlen quinqehuis motlalose queja tlapetlanilotl. Huan TOTECO Dios quipitzas nopa tlapitzali huan quisas para motehuis ihuaya icualancaitacahua. Huan yajaya quiapiya chicahualistli queja se hueyi ajacatl tlen temajmatía nopano ica tlani. <sup>15</sup>Huan TOTECO Tlen Quinyacana Ielhuicac Ejcahua Ma Tlatlanitij quin-

manahuis itlacajhua. Huan itlacajhua quinzontlamiltise inincualancaitacahua. Huan ininpan nejnemise queja tetini para tlatehuitlatztli. Elise queja se tecuani tlen quicua tlen quitlantoc huan quii ieso. Quema ya tlatlantose, itlacajhua tzajtzise ica paquilistli queja se tlen quiioc xocomeca atl tlen cococ. Quema yajuanti quinzontlamiltise nochi inincualancaitacahua elise queja nopa caxitl ipan tiopa tlen temitoc ica ieso nopa tlapiyali para ica quitatzejtzelohuaj icuacua nopa tlaixpamitl. <sup>16</sup>Huan ipan nopa tonali, TOTECO Dios quinmaquixtis itlacajhua queja se tlamocuitlahuijquetl quinmanahuía iborregojhua. Huan ipan nopa tonali itlacajhua petlanise ipan itlal queja piltetzitzi tlen yejyetzitzi tlen quintlatzquiltitjoque ipan se corona. <sup>17</sup>Tlahuel cuajcualtzi elis nopa tlali huan nochi elis nelía yejyetzitzi. Huan pampa oncas miyac trigo huan miyac xocomecatl, nopa telpocame huan ichpocame moscaltise yejyetzitzi huan quiapiyase miyac chicahualistli.

**TOTECO quinmaquixtis itlacajhua**

**10** Xijtlajlanica TOTECO ma huetzis atl quema ajsis tonali para seliyase cuatini. Huan yajaya tlen quichihua ma tlapetlani huan ma onca huejhueyi mixtli inmechmacas atl hasta mocahuas. Queja nopa nochi toctli ipan nochi mila temacas cuali itlajca. <sup>2</sup>Pero quema inquintlatzintquillaj totiotzitzitzi se tlenijqui, san tlapic tlen inmechnextilise. Huan yonque tetonalitani quijtohuaj para quipixque tlanextili campa quitaque tlen panos teipa, nochi inintlajtol san istlacatili. Tlayoltlaliáj ica tlajtoli tlen ax neli huan quijtohuaj para ax huala tlatzacuiltli. Yeca nochi israelitame yohuij ipan iniojhui queja borregojme tlen ax quiapiyaj se tlen melahuac inintlamocuitlahuijca para quinmanahuisquía huan yeca nelía tlaijiyohuise.

<sup>3</sup>Huajca TOTECO quijtohua: “Tlahuel nicualantoc ica nopa tlamocuitlahuiani huan ica nopa tlayacananí tlen ax melahuac huan yeca niquintlatzacuiltli. Pero niimoTECO Tlen Niqinyacana Noelhucac Ejcahua Ma Tlatlanitij nihualas huan

niquintiochihuas notlacajhua tlen iixhuihua Judá tlen huejcajquiya. Quena, niquinchihuas tetique huan yejyetzitzi queja nocahuayo tlen más mocualtlalijtoc para tlatehuus huan más quiپیa tlatlepanitacayotl. <sup>4</sup>Huan se iteipa ixhui Judá elis queja nopa tetl tlen más monequi para ipan quiquetzase se cali tlen tetl pampa itztoc tlen más monequi ipan nopa cali tlen na nijchihua. Yajaya elis queja nopa tlaquetzali tlen ipan quiquetzaj se yoyon cali. Elis queja nopa cuahuitoli tlen más cuali para tlatehuicayotl. Huan iixtla ya cholojtehuase nochi tlayacanani tlen quiniquij tetlajiyohuiltise. <sup>5</sup>Iteipa ixhuihua Judá elise soldados tlen más motemacaj ipan tlatehuicayotl huan nejnemise ipan inincualancaitacahua queja elisquíaj soquitl ipan calles. Huan tlatehuise chichahuac pampa niininTECO niitztos ininhua ya. Huan quintlanise nochi ipan tlatehuicayotl hasta quinpinahualtise inincualancaitacahua tlen tlejcoj ipan cahuyojme.

<sup>6</sup>“Huan na niquinmacas chichahualistli ininteipa ixhuihua Judá huan José huan niqinmaquixtis. Huan pampa niqintlasojtlas, niquinchihuas sampa ma mocuepaca huan itztose ipan inintlal. Huan elis queja ax quema niqintlahuelcajtoc pampa na niDios niininTECO huan nijtlacaquilis nochi tlen quijitose quema momajitose ica na. <sup>7</sup>Huan iteipa ixhuihua Efraín mochihuase queja tlatehuiani tlen tlahuel motemacaj huan quiپیay miyac chichahualistli. Huan paquise miyac queja paquij tlacame tlen quiitoque miyac xocomeca atl. Huan ininconeuhua quiitase quejatza niininTECO niqinincelña huan yolpaquise noixtla. <sup>8</sup>Huan niqiquisis para niqinnotzas ma hualaca huan nimantzi hualase mosentilise pampa ya niqinmaquixtijtoc. Huan nopa quentzi israelitame tlen noja mocahuase yoltoque, pehuase momiyaquilise huan sampa mochihuase nelmiyac tlacame queja eliyayaj achtohuiya. <sup>9</sup>Yonque niqinsemantoc nopa israelitame campa hueli ipan tlaltini tlen nelhuejca, nopano sampa nechilnamiquise huan nechtemose. Huan yajuanti huan ininconeuhua mocuepase para sampa itztose ipan

inintlal. <sup>10</sup>Quena, niquinchihuas ma mocuepaca tlen tlali Egipto huan tlen tlali Asiria. Huan niquinhualicas hasta ipan tlali Galaad huan ipan tlali Líbano. Huan itztose tlahuel miyac yajuanti tlen mocuepase hasta ayoc quiپیyase campa mochihuase. <sup>11</sup>Huan yonque quipanose tlahuhijcayotl queja huejcajquiya quema quipanoque nopa Hueyi Atl Chichiltic, na nijtzacuilis ichicahualis nopa atl para ma ax quincocos. Nopa atemitl Nilo ipan tlali Egipto, nijchihuas ma huaqui para huelis quisase ipan nopa tlali. Huan niqinpinahualtis nopa tlayacanani ipan tlali Asiria tlen tlahuel mohueyimatiyayaj huan nijtlamiltis nopa tequihuejcajotl tlen tlali Egipto quipixqui.

<sup>12</sup>“Huan nijchihuas para notlacajhua ma quiپیyaca chichahualistli noixtla. Huan yajuanti nejnemise nica huan neca campa quinequise huan quihuicase notoca na.” Queja nopa quijito TOTECO.

#### Quihuejcamajcahuase inintlamocuitlahuijca

**11** ¡Xiquitaca! Nopa tlali ipan Israel tlen itoca Líbano quiselis se hueyi tlatzacuiltistli. Elis queja quitlapos ipuertas para ma calaqui se hueyi tlitl huan nopa tlitl quintlamitlatis nochi tiocuatini tlen más yejyetzitzi quipixqui. <sup>2</sup>Huan nochi tlacame nopano tlahuel mocuesose huan hasta elis queja nopa cuatini tlen ocotl chocase pampa quimatise san se ininpantis. Ama ya huetztoque nopa tiocuatini yonque eliyayaj nelía yejyetzitzi huan huejcapantique. Eltoc queja nopa ahua cuatini nopano campa itoca tlali Basán chocaj ica majmajtli pampa nochi cuatitlamitl tlen quiپیayaya miyac cuatini hasta axaca huelqui pano nopano, ama ya quinmajcajtoque tlachí. <sup>3</sup>Xijtlacaquilica quejatza chocaj nopa tlamocuitlahuiani tlen borregoime ipan tlali Israel pampa nochi nopa sacapetlatl campa quinnemiltijque inintlapiyalhua ya sosolijtoque. Ama san caquisti cone tecuanime tlen nalcaj pampa ya tlanqui nochi nopa yejyetzitzi cuatitlamitl nechca atemitl Jordán campa mocajque para itztose.

### Ome tlamantli tlamocuitlahuiani

<sup>4</sup>Quej ni nechilhui NoTECO Dios: “Xiya huan xiquinmocuitlahui notlacajhua tlen itztoque queja borregojme tlen tlaiyocatlalilme para miquise. <sup>5</sup>Queja tlacohuani tlen quincohuaj borregojme huan quinmictíaj huan ax tleno moilhuíaj, nopa israelita tlacyacanani quinmictíaj notlacajhua huan ax momacaj cuenta intla quihuicaj tlajtlacoli. Huan queja tlanamacani quinamacaj borregojme huan san quijtohuaj: ‘Tlascamati TOTECO pampa ya nimochitoc nirico’, nopa israelita tlacyacanani tlen itztoque queja tlamocuitlahuiani tlen ax melahuac quintemactilíaj notlacajhua ma miquise huan ax quintlasojtlaj. <sup>6</sup>Para na ayoc niquintlapojpolhuis tlen fiero itztoque ipan ni tlali. Nijchihuas para sese yajuanti ma huetzica ininmaco ininhuampoyohua huan imaco inintlanahuatijca huan yajuanti quinquechtzontequise. Huan nopa ax cuajcualme quichihuase para nopa tlali ma mocahua queja huactoc tlali, pero na ax niqinmanahuis notlacajhua tlen nopa ax cuajcualme.”

<sup>7</sup>Huajca na nimotlali para niqinmocuitlahuis nopa israelitame tlen quichiya-yayaj tlatzacuilitli huan itzttoyaj queja borregojme tlen ya tlaiyocatlalilme para miquise. Ni borregojme quixnextiyayaj tlen más teicneltziti tlen nopa tlacame. Huan teipa nijcuic ome cuatopili. Se nijtocaxtlali “Itlasojtlacayo”. Huan nopa seyoc nijtocaxtlali “Quinchijtoc San Se”. Huan quej nopa, niqinmocuitlahui nopa borregojme queja se cuali tlamocuitlahuiquetl quichihuasquía huan queja TOTECO nech-nahuatijtoya. <sup>8</sup>Huan ipan se metztlí, niqintzontlamilti eyi tlamocuitlahuiani. Pero ax nijpixqui noyolo ica nopa borregojme, niyon ica tlacame tlen nopa tlali, huan yeca yajuanti nechcocolijque.

<sup>9</sup>Huajca quej ni niqinilhui tlacame tlen nopa tlali tlen itzttoyaj queja nopa borregojme: “¡Ayoc nielis niimotlamocuitlahuijca niyon ayoc nimechtlamacas! Intla inquinequi inmiquise, huajca ximiquica. Intla se quinequi inmechmictis, huajca ma inmechmicti. Huan tlen noja mocahuase, ma motzontlamiltica se ica seyoc.”

<sup>10</sup>Teipa nijcuic nopa cuatopili tlen itoca: “Itlasojtlacayo” huan tlen quinextía noteicnelijcayo huan nijtlajcopostejqui. Ya nopa nijchijqui para nijxolehuas nopa tlajtolsencahuali tlen nijchijtoya ica nochi taltini. <sup>11</sup>Huajca queja nopa ipan nopa tonali tlanqui nopa tlajtoli tlen nijchijtoya ininhuaya. Huan nochi nopa tlacame tlen teicneltziti nechtlachilijtoyaj huan quimachilijque para ica nopa tlamantli tlen nijchijqui quinnextiliyaya tlen TOTECO quinequiyaya quinyolmelahuas.

<sup>12</sup>Huan niqinilhui nopa tlacyacanani: “Intla inmechpactía huajca xinechtlaxtlahuica tlen inquitaj nitequititoc. Huan intla ax inmechpactía, huajca san xijcahuaca.”

Huajca yajuanti nechpatiitaque huan nechmacaque 30 plata tomi.

<sup>13</sup>Huan TOTECO nechilhui: “Xijcui nopa piltlaxtlahuiltzi tlen mitzmacaque queja motlaxtlahuil huan xijmajcahua ipan itiopa TOTECO para ma quicahuaca campa quiajcocuij tomi.” Huajca nijcuic nopa piltomintziti huan nijcuamajcajqui ipan itiopa TOTECO para quitlalise campa quiajcocuij tomi. <sup>14</sup>Teipa nijtlajcopostejqui nopa seyoc cuatopili tlen itoca eliyaya: “Quinchijtoc San Se”. Huan queja nopa, niqixnexti para tlali Judá huan tlali Israel tlen achtohuiya mocajque sentic, ya motlajcoitaque.

<sup>15</sup>Huan TOTECO nechilhui: “Xijchihuati sampa nopa tequitl tlen se tlamocuitlahuiquetl pero ama ximochihua queja se tlamocuitlahuiquetl tlen ax cuali huan xijcui nopa tlamantli tlen yajaya quihuicasquía. <sup>16</sup>Ya ni quinnextilia para nijtlalis ipan ni tlali se tlamocuitlahuiquetl tlen ax quintemos nopa pilborregojtztiti tlen mo-cuapolojtoque, niyon ax quinmocuitlahuis tlen ontlacajtoque, niyon ax quin-pajtis tlen mometzpostectoque, huan niyon ax quiajcolpantlalis nopa borrego tlen más tlaxicojtoc. Pero quena, quicuas inin-nacayo nopa borregojme tlen más tomahuaque. Huan hasta iniisti nojquiya quitzayanas huan quicuas. <sup>17</sup>Fiero ipantis nopa tlamocuitlahuiquetl tlen ax tleno ipati huan tlen quintlahuelcahua nopa bo-

rregojme. Ica imachete TOTECO quimaquilis ipan iajcol huan iixtiyol tlen inejmatl. Huan ima tlen quinpalehuijtosquía iborregojhua mocahuas senquistoc huactoc. Huan iixtiyol tlen quintlachilijtosquía mocahuas popoyotzi.”

#### TOTECO quimanahuis Jerusalén

**12** Ya ni nopa tlajtoli tlen TOTECO nechmacac ica tlen ininpantis israelitame. Quena, TOTECO tlen quipatlajqui elhuicactli, huan quitlalili itzinpehualtil ni tlattepectli, huan quichijqui nopa tonaltzi tlen eltoc ipan iyolo sesen tlatcatl quej ni, quijtohua: <sup>2</sup>“Nijchihuas altepetl Jerusalén para elis queja se caxitl tlen temitoc ica nocualanayo para nochi sequinoc tlatlani. Elis queja temitoc ica se pajtli tlen tlahuel cococ huan fiero. Huan quinchihuas ma moihuintica huan ma huihuipicaca nochi tlacame tlen ehuj ipan tlatlani tlen quinequise quintehuse tlali Judá huan altepetl Jerusalén. <sup>3</sup>Quena, ipan nopa tonali nijchihuas Jerusalén ma eli queja se hueyi tetl tlen tlahuel etic. Huan yonque nochi tlatlani mosentilise para quitehuse, nochi tlen quinequise quiolinise, quintlamitepachos.” <sup>4</sup>Quej ni quijtohua TOTECO: “Ipan nopa tonali, na niquintemajmatis nochi cahuyojme tlen quinhualicaj soldados para quitehuse altepetl Jerusalén. Huan nopa soldados tlen ipan tlejcoque niquinchihuas ma tlapoloca. Pero na niquinmocuitlahuis nochi tlali Judá ehuan. Huan nochi cahuyojme tlen ininpan tlejcoque para tlatehuse mocuepase popoyotziti.

<sup>5</sup>“Huan nopa tlayacanani ipan tlali Judá quiitase ya ni huan quijtose: ‘Xiquitaca, Jerusalén ehuan quipantfaj chichualistli ipan TOTECO Tlen Quinyacana Ielhuicac Ejcahua Ma Tlatlanitij pampa yajaya tlen ininTeco.’

<sup>6</sup>“Ipan nopa tonali nijchihuas nopa tlayacanani ipan tlali Judá elise queja se tlicuahuitl tlen quichihuas ma tlatla miyac cuatini ipan se cuatitlamitl. Itztose queja tlicuahuitl tlen quichihua ma tlatlas trigo pixquistli tlen huactoc huan nopa tlayacanani quintlatise nochi tlatlani tlen moca-

huaj nechca tlen innejmatl hasta iniarraves. Pero ipan nopa tonali quema Judá ehuan quintlanise nopa tlatlani, altepetl Jerusalén sampa temis ica tlacame ica miyac paquillistli para itztose ipan ini-altepe.

<sup>7</sup>“Pero na, niimoTECO, achtohui ni-quinmaquixtis nopa tlacame tlen itztoque ipan tlali Judá huan teipa niquinmaquixtis tlen ehuan ipan altepetl Jerusalén. Nijchihuas ya nopa para nopa tlacame tlen ehuan ipan altepetl Jerusalén tlen iteipa ixhuihua David ax quiselise más tlatlepanitacayotl que ne sequinoc tlen itztoque ipan sequinoc altepetini ipan tlali Judá. <sup>8</sup>Ipan nopa tonali TOTECO quimanahuis nopa tlacame tlen itztoque ipan altepetl Jerusalén. Huan yeca se tlen ax quiipiyas más chichualistli ipan nopa tonali quiipiyas chichualistli queja Tlanahuatijquetl David. Huan tlen hualahuaj ipan iteipa ixhuihua David elise queja Toteco Dios, queja ielhuicac ejcahua TOTECO tlen yohuij iniixtla notlacajhua. <sup>9</sup>Huan ipan nopa tonali nimotlalis para niqintzontlamiltis nochi tlacame tlen nochi tlatlani tlen hualse para quitehuse altepetl Jerusalén.

#### Moyolcuepase israelitame

<sup>10</sup>“Huan ipan nopa tonali niquinmacas iteipa ixhuihua David huan nochi tlen itztoque ipan Jerusalén nopa Tonaltzi tlen quinpalehuis para moicnelise huan momajtose. Huan yajuanti nechitase na tlen nechtlapohuilijque noelchiquicanahuiya huan nechchoquilise queja chocaj tetajme quema miqui se conetl tlen iyojtzi. Huan mocuesose nopampa na queja mocuesohuj quema miqui se achtohui ejquetl. <sup>11</sup>Huan ipan nopa tonali, ipan altepetl Jerusalén chocase huan mocuesose achi más huan ax queja panoc quema mijqui nopa cuali tlanahuatijquetl tlen itoca Josías huejcajquiya nechca Hadad Rimón ipan nopa tlamayamitl tlen itoca Meguido.

<sup>12</sup>“Nochi israelitame campa hueli ipan ni tlali chocase miyac ica tlen nechchihuilijtoque. Sesen huejhuelyi familia chocase iyoca. Tlacame tlen itztoque iteipa ixhuihua David yase iyoca. Huan ininsihujhua

nojquiya moyocaquixtise para mocuesose. <sup>13</sup>Huan chocase huan mocuesose ininseltitzitzi nochi iteipa ixhuihua Leví. Huan ininseltitzitzi mocuesose iteipa ixhuihua Simei. Huan sihuame mocuesose iyoca tlen ininhuehujhua. <sup>14</sup>Huan chocase nochi ipan nochi sequinoc huejhueyi familias tlen israelitame. Huan sesen hueyi familia chocas huan mocuosos iyoca ipampa tlen nechchihuilitoque. Huan sesen tlatatl chocas iyoca tlen isihua.

**13** “Ipan nopa tonali nijtlapos se ameli campa meya miyac atl para nochi iteipa ixhuihua David huan nochi Jerusalén ehuani. Huan nopa atl quinpajpacas tlen inintlajtlacolhua huan tlen nochi tlamantli tlen ica moijtlaçojtoque. <sup>2</sup>Ipan nopa tonali niquintlamiixpolihuiltis nochi totiotzitzitzi huan tlaixcopincayome tlen quinhueyichihuaq ipan nopa tlali huan ayoc quema quiihlamiquise inintoca. Nojquiya niquintlamiixpolihuiltis nopa tlaçajcayajca tiocamanalohuani huan nochi nopa ajacame tlen Axcualtlatatl tlen quin-yacana.” Queja nopa quiijtohua TOTECO Tlen Quinyacana Ielhuicac Ejcahua Ma Tlatlanitij. <sup>3</sup>“Huan inntla noja motlalanas se huan camatis queja se tiocamanaløjquetl, itata huan inana quiihhuise: ‘Monequi timiquis pampa tiistlatatitoc. Tiquijtohua para TOTECO mitzmacatoc motlajtol, pero yajaya ax quiijtotoc.’ Huan ipan nopa tlalochtli itatahua quicuaxahuase ica se huehueyac cuatlamintli huan quimictise.

<sup>4</sup>“Ipan nopa tonali nochi tlen quuitase ipan tlanextili queja tiocamanalohuani mopinahuae pampa quimatise para ax melahuac huala tlen na. Axaca mohueyimatís huan quiijtos para yajaya se tiocamanaløjquetl pampa quimatis para ax neli. Huan ayoc aqui quinequis tlaçajcayahuas huan moquentis nopa yoyomitl tlen fiero queja quemantzi moquentíaj tiocamanalohuani tlen melahuac ipan ni tonali. <sup>5</sup>Huan teipa se tlatatl tlen quiselis tlajtoli tlen ax melahuac, quiijtos: ‘Ax na nitocamanaløjquetl. Na se nimilchijquetl. Hasta quema noja eliyaya nioquichpil, san nitequiti mila.’

<sup>6</sup>“Huan se quiihhuise: ‘Huajca çpara tlen lijlipintic moma?’ Huan yajaya quiijtos: ‘Ya ni pampa nechcocojque ipan ininchaj nohuampoyohua.’”

#### Quimaquilise itlamocuitlahuicaj TOTECO

<sup>7</sup>Quej ni quiijtohua TOTECO Tlen Quinyacana Ielhuicac Ejcahua Ma Tlatlanitij: “Nijcahuilis ma quimictica nopa Tlamocuitlahuicajquetl tlen na nijtitlantoc, yajaya tlen más nonechca huan tlen san se queja na. Quena, nitlanahuatis ma quimictica nopa Tlamocuitlahuicajquetl huan nochi nopa borregojme mosemanase. Huan na nijtlalanas noma ica nopa tlaçame tlen itztoque queja pilborregojtitzitzi huan nojquiya tlaijiyohuise. <sup>8</sup>Ipan sesen eyi israelitame, ome miquise huan setzi mocahuas ipan ni tlali. <sup>9</sup>Huan nopa pilquentzi israelitame tlen noja mocahuase ipan ni tlali, niqinpanoltis ipan se hueyi tliatl para niqinyeyecos huan niquintlapajpacchihuas hasta itztoque queja plata huan oro tlen senquistoc cuali. Huan yajuanti nechtzajtzilise, huan na niquintlacaquilis, huan niqiijtos: ‘Ya ni notlacaçhua.’ Huan yajuanti quiijtose: ‘TOTECO yajaya toDios tojuanti.’”

#### TOTECO mocuepas ipan tlattepectli

**14** ¡Xijtlachilica! Ya monechcahuia nopa tonali tlen itoca itonal TOTECO quema yajaya tetlatzacuiltis. Huan tlaçame inmechquixtilise tlen imoaxca huan motlajcoxelhuilise imoixtla. <sup>2</sup>Quena, ipan nopa tonali TOTECO quichihuas para nochi taltini ma mosentilica para quiyahualose altepetl Jerusalén. Huan quitechise huan moxcatise nopa altepetl. Calaquise ipan nochi caltini para quicuise nochi tlen quinequise huan para quinchihuilise tlen hueli nopa sihuame. Huan quinxtequise tlajco nopa tlaçame huan quinhucase ilpitoque ipan seyoc tlali. Huan nopa seyoc tlajco mocahuase ipan altepetl Jerusalén.

<sup>3</sup>Pero teipa hualas TOTECO huan iselti quitechuis ininsoldados nochi taltini. Quena, tlatehuis queja tlatehuiqui ipan nopa tonali quema oncac hueyi tlatehuiçayotl. <sup>4</sup>Ipan nopa tonal TOTECO hualas

huan moquetzas ipan nopa tepetl tlen itoca Olivos tlen mocahua iixmelac altepetl Jerusalén ica campa quisa tonati. Huan nopa tepetl Olivos motlajcoitas huan mochihuas se hueyi tlamayamitl tlen ajsis hasta campa quisa tonati huan hasta campa oncalaqui. Huan queja nopa, tlajco tlen nopa tepetl mocahuas ica norte, huan tlajco mocahuas ica tlani. <sup>5</sup>Huan ipan nopa tlamayamitl imojuanti inmochololtise pampa nopa tlamayamitl tlen mochijtoc tlen notepe ajsis hasta Azal. Quena, incholese queja huejcaquiya cholojque imohuejcapan tatahua quema mojmolini tlali ipan nopa tonali quema quihuicayaya tequitl Tlanahuatijquetl Uzías ipan tlali Judá. Huan huajca hualas TOTECO, yajaya tlen noDios, ininhuaya ielhuicac ejcagua huan ininhuaya nochi itlatzejtzeltijca tlacajhua.

<sup>6</sup>Huan ipan nopa tonal, tonati, metztli huan sitlalime ayoc tlahuise huan ax oncas se tlahuili tlen chicahuac niyon ax oncas tzintlayohuilotl. <sup>7</sup>Elis se tonal tlen senquistoc seyoc tlamantli pampa ax quema oncas se tonal queja nopa. San TOTECO iselti quixmati quejatza elis nopa tonal pampa ax oncas tzintlayohuilotl niyon tlen nelia tlatlanextli. Ica tiotlac ipan nopa tonal quema quinamiqui pehuas para tlayohuas, oncas tlahuili queja elisquía tonaya. <sup>8</sup>Huan ipan nopa tonal quisas ipan altepetl Jerusalén atl tlen temacas yolistli tlen yancuic. Huan tlajco nopa atl ajsis ipan nopa Hueyi Atl Mictoc huan nopa seyoc tlajco ajsis ipan nopa Hueyi Atl tlen itoca Mediterráneo. Huan ne seyoc tlajco nopa atl quisas sesen xihuilitl ipan nopa tonali quema tlahuel tlaseseya huan ipan nopa tonali quema tlatotoniya.

<sup>9</sup>Huan TOTECO elis Tlanahuatijquetl ipan nochi tlattepectli. Quena, ipan nopa tonali momacase cuenta para onca san setzi Dios, yajaya tlen TOTECO. Huan san yajaya nochi quixmatise huan quihueyichihuase. <sup>10</sup>Nochi ni tlali mopatlas miyac quema chicahuac molinis tlali. Mochihuas queja se hueyi tlamayamitl tlen pehuas altepetl Geba ica norte tlen tlali Judá huan ajsis hasta altepetl Rimón tlen mocahua ica tlani tlen altepetl Jerusalén. Huan alte-

petl Jerusalén sampa motlalanans huan tlejcos más huejcapa, pero mocahuas campa ama eltoc. Huan altepetl Jerusalén sampa mohueyichihuas. Quipiyas miyac tlacame tlen nopa puerta tlen eliyaya inixca ininteipa ixhuihua Benjamín huan hasta nopa puerta ipan esquina campa eltoya nopa achtohui puerta. Teipa Jerusalén yas campa nopa Huejcapantic Cali Hananeel campa tlachiyaj hasta campa quichihuaj ixcomeca ayo nopa tlanahuatijquetl. <sup>11</sup>Huan altepetl Jerusalén temis ica tlacame huan ayoc quema moxolehuas. Nochi nopa altepetl huan itlacajhua itztose temachme.

<sup>12</sup>Huan ya ni elis nopa tlatzacuilitli tlen TOTECO quintitlanilis nochi nopa tlacame tlen nopa tlaltini tlen hualajque para quitehuise altepetl Jerusalén: Inintlacayohua nochi inintlacajhua ijtlacahuis huan lochonis yonque noja yoltoque huan moquetztoque ica inixcixhua. Huan lochonise iniixtiyolhua huan ininnenepil ipan inincamac.

<sup>13</sup>Ipan nopa tonali TOTECO quititlanis se hueyi majmajtli huan nochi tlacame majmahuise hasta ax quimatise tlachque quichihuase. Huan ininseltitzitzi tlacame quitlalanase ininma para momaquilise se ica seyoc. <sup>14</sup>Huan iixhuihua Judá nojquiya tlatehuitij ipampa altepetl Jerusalén ica tlen hualajque ipan sequinoc tlatini. Huan quintlamiichtequilise nopa tlacame nochi tlamantli tlen tlachijchihuali ica oro, plata huan yoyomitl. <sup>15</sup>Huan nopa cocolistli tlen TOTECO quititlanis ipan tlacame nojquiya quinajsis cahuayojme, mulas, camellos, burrojme huan nochi tlamantli tlapiyalime tlen nopa tlatehuiani tlen sequinoc tlatini quinpixtose campa mochihuase.

<sup>16</sup>Huan nopa tlacame tlen tlatini tlen quitehuijque Jerusalén huan tlen noja mocahuase yoltoque, yase sesen xihuilitl ipan Jerusalén para quihueyichihuatij nopa Tlanahuatijquetl tlen nopano itztoc. Huan nopa Tlanahuatijquetl elis TOTECO Tlen Quinyacana Ielhuicac Ejcagua Ma Tlatlanitij. Quena, yase para quichihuatij nopa ilhuilitl tlen nopa pilxajcaltzitzi. <sup>17</sup>Huan

intla sequin tlacame tlen nopa sequinoc tlaltini ax quinequise yase ipan altepetl Jerusalén para quihueyichihuatij nopa Tlanahuatijquetl tlen itztos TOTECO Tlen Quinyacana Ielhuicac Ejcahua Ma Tlatlanitij, huajca TOTECO quichihuas para ma ax huetzi atl ipan inintlal. <sup>18</sup>Huan intla tlali Egipto ehuan ax quinequise yase, huajca TOTECO quichihuas ma ax huetzi atl ipan nopa tlali. Huan inintlacajhua quiselise nopa cocolistli tlen TOTECO quintitlanili nopa sequinoc tlaltini tlen ax quinequij yase para quichihuatij nopa ilhuitl tlen pilxajcaltziti. <sup>19</sup>Nopa cocolistli elis nopa tlatzacuiltli tlen quiselise tlali Egipto ehuan huan nochi sequinoc tlaltini tlen ax yase para quichihuase nopa ilhuitl tlen pilxajcaltziti.

<sup>20</sup>Ipan nopa tonal quitlalise se tlajcuiloli ipan nochi tlamantzitzi huan quijtos: “Ya ni tlatzejtzeltic huan tlaiyocatlalili

para itequi TOTECO” pampa nochi tlamantli elis tlatzejtzeltic o tlaiyocatlalili para TOTECO. Huan nochi tlamantli quipiyase nopa tlajcuiloli hasta ininteposcamachal cahuyojme huan hasta nopa miyac chachapali ipan itiopa TOTECO tlen ipan quisencahuaj tlacualistli. Nochi elise tlatzejtzeltic queja nopa huejhueyi caxitl tlen eltoque nechca tlaixpamitl. <sup>21</sup>Nochi tlamantzitzi hasta tlen ipan quisencahuaj tlacualistli ipan altepetl Jerusalén huan altepetl Judá elise tlatzejtzeltic huan tlaiyocatlalijtoc para TOTECO. Huan yajuanti tlen yohuij huan quihuicase se tlapiyali para quimictise, quicuisse se nopa chachapali tlen quitequihuse para ipan quiicxitise inacayo nopa tlapiyali. Huan ipan nopa tonali ayoc oncas tlacame tlen fiero o tlen tlanamacaj ipan itiopa TOTECO, Yajaya Tlen Quinyacana Ielhuicac Ejcahua Ma Tlatlanitij.